

DIARIO awor tin tur prueba den nan man!

Procurador General a keda sin firma "Memo" manda pa Minister

ORANJESTAD – A dura algun dia prome cu DIARIO por a logra haya e documento nan correspondiente den nos box, pero awor ta asina leu cu tur cos a yega di nan mes y nos tin tur prueba kico tur a pasa y kendenan tur a uni den un solo intencion pa bula cabes di Comisario Jan van der Straten.

Pruebanan palpable cu nos tin den nos poder ta demostra claramente con hende ta cambia di opinion na merced di Gobierno y esaki ta algo sumamente peligroso pa nos sistema hudicial.

Semper den pasado nos a para pa nos husticia y nos, mas cu tur hende, a sostene e imparcialidad di nos Ministerio Publico.

Lamentablemente susedidonan di ultimo temponan ta treciendo e organo imparcial aki den masha descredito den comunidad.

No solamente pasobra ta aña di eleccion, pero simplemente pasobra tin cosnan cu ta sosodiendo cu no por mira luz di dia.

DIARIO ta bisa for di awor caba cu nos no tey pa "tapa cos" pa ningun hende, sino nos tey pa informa y defende e pueblo aki.

Si esnan cu ta wordo paga no por defende e pueblo aki, anto ken mas cu DIARIO pa por haci esaki.

Nos ta referiendo na e ultimo desaroyonan cu a bin ta tumando lugar den nos

Ministerio Publico, kendenan a cambia di opinion na un forma masha sorprendente den e caso di Flexi-Team cu a detene un di e empleadonan di Departamento di Prensa di Gobierno pa ta menasa hende na telefon constantemente.

Ministerio Publico den e caso aki a tuma un decision, via di un Fiscal, kende pa mas di un siman largo a atende cu polisnan di Flexi-team riba e caso aki padepues awor laba man.

Nos tin informacion clave cu e Fiscal aki keto bay ta para duro tras di e polisnan, pero cu ta for di halto a traha un rapport yen di ponencianan suhestivo den dje.

Asina por tuma nota con Procurador General di Aruba ta duda den e palabra di Korpschef di Polis, kende a traha un rapport manda pa Minister di Husticia na unda e ta bisa claramente cu Prensa a yega na e sitio door cu nan a scucha e polisnan pidi pa

resfuerzo via scanner. Den e "memo" di PG na Minister Rudy Croes, e ta insinua comosifuera cu e no ta kere cu esaki ta berdad pasobra despues di un investigacion a resulta cu no tabatin pidimento di refuerzo na e sitio.

E ta lanta e pregunta: Ken sa mihor, Hefe di Polis of Procurador General??

Ademas varios otro polis tambe a scucha ora cu a pidi refuerzo.

DIARIO a tuma nota tambe con e propio Prome Minister di Aruba a manda un carta pa su colega di Husticia na unda e ta bisa claramente den dje cu e no tin confianza mas den Jan van der Straten y cu e no por keda den e posicion di Comisario di Polis mas.

Tambe por a mira cu Minister Rudy Croes a manda un carta pa su colega di Hulanda cu e peticion pa kita Jan van der Straten for di su posicion.

Mester menciona cu e asunto aki ta uno hopi serio, pasobra

ta trata aki di un carta pisa caminda hasta "memo" di un comisario amigo di Minister Rudy Croes ta hinca den dje, caminda cu e persona aki cu apenas a bira Comisario ta manda bisa cu e no kier traha cu Flexi-team mas, comosifuera cu ta e ta dicidi esey den Cuerpo di Polis.

Ta straña nos cu den un reunion caminda cu e PG tabata presente den compania di un cantidad di funcionarionan halto di Polis, el a duna di conoce cu e no ta compronde kico Minister Rudy Croes ta buscando problema cu Jan van der Straten, pasobra el a actua corecto.

El a keda di bay papia cu e Minister riba e cuestion aki, pero despues di algun dia su mes a dal un buelta di 180 grado. Ta di con?

Loke mas nos ta haya straño ta e hecho cu Procurador General no a firma e "memo" cu el a manda pa Minister Rudy Croes.

Kizas tin un motibo pa esaki?

Kizas e ta conciente cu e locual ta den e memo aki nota cuadra cu e berdad y solamente e berdad?

Of e ta pensa cu door cu el a traha un memo manda pa Minister sin cu el a papia cu doño di curpa mes riba e asunto aki, cu e no a tuma e mihor decision?

Laga nos mira kico ta bay sosode den e dianan nos dilanti, pasobra tur cos ta muestra cu tin algun desaroyo masha straño tumando lugar den nos sistema hudicial aki na Aruba.


Danki Dios cu Minister Pechtold ta na caminda pa Aruba otro siman pa e pone su mes mihor na altura di e "klik" cu a forma awor den husticia na Aruba.

Ta asina tin hende ta pretende cu nos mester bay riba nos mes y cu nos sistema hudicial mester ta independiente di Hulanda.

Awor cu e ta resorta bao di Hulanda mes tin e cosnan aki ta pasa, imagina bo cu e tabata wordo maneha localmente pa nos politiconan!

TELEFONAN DI DIARIO
582-6747 - FAX 582-8551

NOS TA UN PUEBLO MASOQUISTA!!!!



BEST DEAL

Tel: 5827100

(Pariba di Aruba Bank, Paradera)

BEST SHOPPING DEAL

Turibana Plaza

Tel: 5865455



Decoracion di
Spada Afl. 75,=